

禮
部
志
稿

Vertical text on the right margin, likely bleed-through from the reverse side of the page.

Vertical text on the left margin, enclosed in a rectangular border, likely bleed-through from the reverse side of the page.

詳校官監察御史_臣龔驂文

編修_臣程嘉謨覆勘

總校官知縣臣楊懋珩

校對官學正臣翁樹棠

謄錄監生臣張仲芳

欽定四庫全書

禮部志稿卷四十七

明 俞汝楫 編

奏疏

修省疏

奏乞回天弭災疏

成化四年禮部尚書姚夔等言竊見今年自春徂夏天
氣寒慘風霾陰翳日色無光近一二日來黃霧蔽天晝

夜不見星日況今四月中旬雷不發聲考之傳記各有
徵應邇者北敵屢寇邊境四方日報災異人事如此天
其或者仁愛皇上有以警動之乎伏惟皇上當春秋
鼎盛之日正嗣續繁衍之時奈何震位尚虛切繫人望
天與祖宗之意固自有待然臣等區區忠愛之私有不
能已竊睹英宗睿皇帝臨阼以來克遵祖訓以御家邦
而慈懿皇太后皇太后貴妃宸妃以下皆有關雎之德
螽斯之美所以子孫衆多支本隆茂伏願皇上修身養

德感天格祖思國本之不輕思宗社之至重思聖體之
當慎惜思聖愛之當均溥將見六宮奉職則百斯男九
廟降祥本支百世實天下之大幸也然此在聖心一轉
移之間非求神奉佛之所能致若西山塔院勞民傷財
所宜停罷阿吒哩之流惑世誣民所當斥回餘如府庫
金帛皆民膏髓不宜浪以費用諸作匠役無大勞效不
宜濫授官爵先儒真德秀有言人主修德講學則天下
安昆虫草木亦得其所誠為至論伏望皇上奮發乾斷

痛自改省于每日視朝之後循祖宗故事詣文華殿留心講筵裁決政務開誠心布公道以來善言親君子遠小人以圖治化雖一服食一言動之間皆遵成憲而行則天意可回而災異可弭矣疏上詔曰上天示戒實警朕心卿等所言足見忠愛內事朕自處置其政之在外者當斟酌行之

星變陳言九事疏

成化二十一年正月以星變求言禮部尚書周洪謨等

言九事

一承平日久俗尚奢麗宜禁止服用違越者治之如律
一成化十七年以前京城內外勅賜寺觀至六百七十
三所後復增建以至西山等處相望不絕自古佛寺之
多未有過于此時者宜申嚴著令敢有增修請額及妄
稱復興古刹者罪之

一光祿寺正統間每歲牲數止四萬成化元年定數不
過十萬近又加十萬猶不足用且以猪易雞鵝民力益

困今除上供外乞查成化初例凡增派浪費悉宜停止
一大慈恩大能仁大隆善護國三寺番僧千餘法王七
人國師禪師多至數十廩餼膳夫供應不足況法王佛
子大國師例給金印用度擬于王者而其間又多中國
人冒濫為之宜令給事中御史覈其本出山番簇者聽
其去留冒濫者悉令還俗

一項歲術士李文昌以養沙點銀之法誣罔不道已寘
之法如復有此輩悉宜斥逐

一今僧官善世以下九十八人道官真人以下一百三十餘人雖無廩祿亦濫名器况其死例有祭祀真人又例得銀印尤費國用宜覈其額設推舉者方許僉書死則與祭否則止令帶銜死亦不祭又教坊司官至五十餘人亦宜止令五人僉書其餘皆帶銜辦事

一自宮求進稱為淨身人者動一二十人雖累加罪謫旋復收用若不痛懲無有紀極今各王府累求內使宜量以賜之否則仍發原籍原衛今後宜依先年枷項放

遣事例勿復收用

一工部歲辦鹿多光祿寺至以襍用而太常寺每歲供祭鹿俱大興宛平二縣買給每隻用銀多至十七八兩宜止于工部歲辦內擇用之

一各處歲辦藥材約有一十二萬餘斤積久陳腐今宜計足二年之用暫免一年採辦後視為例陝西山西河南旱災尤甚歷年逋欠藥材悉宜宥免

上批答曰禁奢侈已行矣供應牲畜所司查奏節省法

王佛子國師禪師番僧供給俱省其半今後漢人冒為之者必罪不宥方士已令都察院禁之淨身人遞發原籍原衛以後仍以十五年例處之餘皆如議

大災異加省疏

弘治三年閏九月禮部尚書耿裕等奏比來據天下諸司奏報風雷雨雹山崩地震之變一一有之考之傳記以雹為沴氣為陰脇陽以迅雷風妖怪雲變氣為失政以山崩為陰乘陽以地裂為陰背陽以地震為越陰之

職專陽之政古之罹此災異者或夷狄背華或小人害
正或生民失常業皆歷歷可考陛下自即位以來內修
德政外溥仁恩宜乎和氣致祥災異消弭夫何半歲之
間災異之大疊見層出蓋天心仁愛為陛下特出此以
致警動之意伏望益修德勤政賑恤以全民命節儉以
省民財服食器用不越乎常土木興作不萌乎念任賢
使能聽言納諫遠宗帝王之道近守祖宗之法以消天
變以迓天休以保承平之業延靈長之祚臣等亦當反

躬思咎痛加修省并行各鎮巡三司等官務祇奉德意
凡事有便於軍民者即為舉行否則即為改革仍修飭
武備用戒不虞奏入上納之

極陳災異疏

弘治七年九月禮部尚書倪岳等言近日南京風雨驟
作太廟孝陵等處樹木有拔仆者且飄落殿宇廊廡厨
庫明樓碑亭等處瑠璃吻獸垂帶飛仙勾頭筒瓦及裏
城坍塌鋪座又今年三月以來甘肅遼東宣府并山東

福建雲南四川等處地震有聲如雷或震倒城垣房屋
壓死人口遼東大風吹倒城垣房屋天色黑暗吹落黑
蟲滿地大如蠅自正月至五月不雨以後霖雨連綿渰
沒禾稼山西天鳴白日有星如杯散為五塊又有火如
斗墜地化為白氣河南白日有星如斗零散而隕有聲
如雷又有星大如輓軸赤光隨之宣府白日有星如斗
隕地有聲化為白氣四川瘟疫盛行長寧等縣病死男
婦三千餘人南直蘇松等府狂風驟雨平地水湧丈餘

坍塌官民房屋二萬二千八百九十餘間城垣鋪舍五十餘處淹死人口二百八十三人海潮逆湧江水泛溢浙江湖州等府縣天雨連綿江潮泛漲居民房屋橋梁圩岾類皆浸壞城垣公廨亦多傾仆湖廣武昌等府州縣天雨不止洪水泛漲四望無涯軍民房屋俱被淹沒城垣公廨等項俱被崩塌通衢撐駕小船老幼移徙山林廣東肇慶府洪水入城淹倒城垣官民公廨倉廩房屋等項廣西柳州等府縣江水泛漲高者丈餘崩塌城